



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

28. 4. 2025. – 2. 5. 2025.

ODJELJENJE ZA BANKARSTVO, SLUŽBA FRONT OFFICE



Sarajevo, 5. 5. 2025. godine

SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA **28. 4. 2025. – 2. 5. 2025.**


Tabela 1: Prikaz kretanja prinosa na državne obveznice

Prinosi	Eurozona			SAD			Velika Britanija			Japan		
	25.4.25	-	2.5.25	25.4.25	-	2.5.25	25.4.25	-	2.5.25	25.4.25	-	2.5.25
2 godine	1,72	-	1,76	↗	3,75	-	3,82	↗	3,86	-	3,86	→
5 godina	2,02	-	2,08	↗	3,86	-	3,92	↗	3,97	-	3,98	↗
10 godina	2,47	-	2,53	↗	4,24	-	4,31	↗	4,48	-	4,51	↗

Tabela 2: Prikaz kretanja prinosa na njemačke Bubillove

Dospijeće	Prinosi			
	25.4.25	-	2.5.25	
3 mjeseca	1,869	-	1,923	↗
6 mjeseci	1,844	-	1,865	↗
1 godina	1,762	-	1,790	↗

Grafikon 1: Prikaz krivulja prinosa državnih obveznica



Grafikon prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 2. 5. 2025. godine (pune linije) i 25. 4. 2025. godine (isprekidane linije). Na donjem dijelu grafikona je prikazana razlika između vrijednosti odgovarajućih prinosa na navedene datume.

EUROZONA

Prinosi obveznica eurozone u odnosu na prethodnu sedmicu su povećani između 4 i 6 baznih poena, iako su tokom sedmice bilježili volatilna kretanja. U mjesečnom ekonomskom biltenu ECB navedeno je da su pri razmatranju odluke o smanjenju referentnih kamatnih stopa u aprilu za 25 baznih poena uzete u obzir nove prognoze inflacije i transmisija monetarne politike. Očekuje se da će se inflacija stabilizovati na srednjoročnom nivou od oko 2%, uz očekivano usporenje inflacije u uslužnom sektoru i usporavanje rasta plata. Ipak, globalne trgovinske tenzije i geopolitičke neizvjesnosti su uticale na povećane silazne rizike po ekonomski rast, što bi se moglo odraziti i na povjerenje stanovništva i kompanija, te na pooštavanje finansijskih uslova. Navedeno je i da će se ECB voditi ekonomskim podacima po principu „sastanak po sastanak“. Potpredsjednik ECB De Guindos je kao ključne izazove naveo trgovinske barijere, oprezne potrošače i geopolitičke tenzije. Član UV ECB Rehn je izjavio da su se mnogi silazni rizici već materijalizovali, dodatno utičući na slabije izgleda privrednog rasta. Ekonomija eurozone je u I kvartalu zabilježila blagi rast, ali je inflacija, koja se nalazi blizu ciljanih 2%, suočena sa silaznim rizicima zbog nižih cijena energenata i mogućih proizvoda iz Kine po damping cijenama. Rehn je upozorio da postoji opasnost da inflacija padne ispod ciljanih 2% i da je snažan euro dodao „budućoj kompleksnosti“ monetarne politike. Član UV ECB De Galhau je izjavio da ECB ima prostora za smanjenje kamatnih stopa i da trgovinski rat neće uticati na

dodavanje cjenovnih pritisaka. Član UV ECB Kazaks je izjavio da bi ECB trebao biti u stanju da nastavi sa postepenim smanjenjem kamatnih stopa.

Očekivanja potrošača o kretanju inflacije u eurozoni u narednih godinu dana su u martu povećana na 2,9%, što je znatno iznad očekivanih 2,5%, i iznad 2,6%, koliko je očekivano prošlog mjeseca. Također, očekivanja za naredne tri godine su povećana na 2,5% sa prethodnih 2,4% (očekivano smanjenje na 2,3%).

Premijer Francuske Bayrou planira da se posveti dugu i slaboj proizvodnji putem smanjenja potrošnje i efikasnim državnim reformama. Uoči glasanja za budžet 2025. godine premijer planira da izbalansira javne finansije i smanji budžetski deficit na granični nivo EU od 3% BDP-a u naredne četiri godine. Budžetski deficit Francuske u 2024. godini je ostao na visokih 6% BDP-a, dok je cilj da se u ovoj godini smanji na 5,4%.

U prethodnoj sedmici objavljen je veliki broj ekonomskih indikatora za regiju eurozone, od čega se mogu izdvojiti podaci o većem rastu inflacije u eurozoni od očekivanja u aprilu (posebno temeljne inflacije), veći rast BDP-a eurozone od očekivanja u I kvartalu, kao i nepromijenjena stopa nezaposlenosti u martu.

Tabela 3: Kretanje ekonomskih indikatora za eurozonu

Red. br.	Ekonomski indikatori		Očekivanje	Stvarno	Prethodni
				stanje	period
1.	Monetarni agregat M3 – EZ (G/G)	MAR	4,0%	3,6%	3,9%
2.	Stopa inflacije – EZ P	APR	2,1%	2,2%	2,2%
3.	Temeljna stopa inflacije – EZ P	APR	2,5%	2,7%	2,4%
4.	Indeks povjerenja potrošača – EZ F	APR	-16,7	-16,7	-14,5
5.	Indeks povjerenja potrošača – Italija	MAR	94,1	92,7	95,0
6.	GfK indeks povjerenja potrošača – Njemačka	MAJ	-25,8	-20,6	-24,3
7.	Indeks ekonomskog povjerenja – EZ	APR	94,5	93,6	95,0
8.	Indeks ekonomskog povjerenja	APR	-	91,5	93,2
9.	PMI indeks prerađivačkog sektora – EZ F	APR	48,7	49,0	48,6
10.	BDP – EZ P (Q/Q)	I kvartal	0,2%	0,4%	0,2%
11.	BDP – Njemačka P (Q/Q)	I kvartal	0,2%	0,2%	-0,2%
12.	BDP – Francuska P (Q/Q)	I kvartal	0,1%	0,1%	-0,1%
13.	BDP – Holandija P (Q/Q)	I kvartal	-	0,1%	0,3%
14.	BDP – Španija P (Q/Q)	I kvartal	0,7%	0,6%	0,7%
15.	BDP – Belgija P (Q/Q)	I kvartal	-	0,4%	0,2%
16.	BDP – Irska P (Q/Q)	I kvartal	-	3,2%	3,6%
17.	BDP – Italija P (Q/Q)	I kvartal	0,2%	0,3%	0,2%
18.	BDP – Austrija (Q/Q)	I kvartal	-	0,2%	-0,4%
19.	Bilans budžeta – Italija (u milijardama EUR)	APR	-	-20,5	-24,4
20.	Maloprodaja – Njemačka (G/G)	MAR	2,4%	0,3%	0,0%
21.	Maloprodaja – Španija (G/G)	MAR	-	3,6%	3,6%
22.	Maloprodaja – Holandija (G/G)	MAR	-	3,4%	0,0%
23.	Obim maloprodaje – Irska (G/G)	MAR	-	-1,3%	1,6%
24.	Obim maloprodaje – Finska (G/G)	MAR	-	-1,3%	-1,0%
25.	Potrošnja stanovništva – Francuska (G/G)	MAR	-0,4%	-1,5%	0,2%
26.	Stopa nezaposlenosti – EZ	MAR	6,1%	6,2%	6,2%
27.	Stopa nezaposlenosti – Njemačka	APR	6,3%	6,3%	6,2%
28.	Stopa nezaposlenosti – Irska	APR	-	4,1%	4,4%
29.	Stopa nezaposlenosti – Italija	APR	6,0%	6,0%	5,9%
30.	Stopa nezaposlenosti – Belgija	APR	-	5,9%	5,9%
31.	Stopa nezaposlenosti – Španija (Q/Q)	I kvartal	10,70%	11,36%	10,61%
32.	Ukupan broj nezaposlenih – Francuska (Q/Q)	I kvartal	-	3.185.800	2.924.800


SAD

Prinosi američkih državnih obveznica su, na sedmičnom nivou, zabilježili rast duž cijele krive. Početak prošle sedmice je bio obilježen ponovnim kritikama i pritiscima na predsjednika FED-a Powella od strane predsjednika Trumpa, koji je pozvao na njegovu smjenu i promptno smanjenje kamatnih stopa. Naime, predsjednik Trump je ponovo kritikovao predsjednika FED-a Powella izjavivši da zna "mnogo više" o kamatnim stopama nego predsjednik FED-a. Na skupu povodom njegovog 100. dana na funkciji, on je zagovarao svoju ekonomsku politiku i tarifni režim. Administracija predsjednika Trumpa će ublažiti carine za automobile smanjenjem carina na strane dijelove u automobilima proizvedenim u SAD-u i sprečavanjem preklapanja istih, uz nadoknadu za prethodna plaćanja. Proizvođači automobila poput GM i Forda pohvalili su ovaj potez. Industrijske grupe su upozorile da bi predložene tarife od 25% mogle povećati cijene, poremetiti proizvodnju i uzrokovati otpuštanja. Carine od 145% na kinesku robu stvaraju značajne izazove za američke kompanije, povećavaju troškove i prisiljavaju kompanije da rekonfigurišu lance snabdijevanja ili uvoze unaprijed kako bi izbjegle carine. Ministar finansija SAD-a Bessent je umanjio zabrinutost zbog šokova u lancima snabdijevanja, pozivajući se na upravljanje zalihama trgovaca na malo i planiranje politike poštene trgovine. Međutim, isporuke u SAD već opadaju, što povećava nesigurnost za preduzeća, od kojih su neka obustavila finansijske smjernice.

U fokusu tržišnih učesnika je bilo objavljivanje podataka o stopi BDP-a u I kvartalu, PCE deflatoru, te podataka sa tržišta rada. Efekti agresivne trgovinske politike predsjednika Trumpa su već osjetni, na što ukazuje kontrakcija ekonomske aktivnosti u navedenom periodu u poređenju s ekspanzijom u prethodnom kvartalu. Također, veći rast cijena u odnosu na očekivanja reflektuje jačanje inflatornih pritisaka usljed agresivne trgovinske politike.

Tabela 4: Kretanje ekonomskih indikatora za SAD

Red. br.	Ekonomski indikatori	Očekivanje	Stvarno stanje	Prethodni period
1.	BDP (Q/Q) – godišnji nivo – prel. I kvartal	-0,2%	-0,3%	2,4%
2.	Lična potrošnja – prel. I kvartal	1,2%	1,8%	4,0%
3.	PCE deflator (G/G) MAR	2,2%	2,3%	2,7%
4.	Indeks ličnih prihoda MAR	0,4%	0,5%	0,7%
5.	Indeks ličnih rashoda MAR	0,6%	0,7%	0,5%
6.	Inicijalni zahtjevi nezaposlenih za pomoć 26. apr	223.000	241.000	223.000
7.	Kontinuirani zahtjevi nezaposlenih za pomoć 19. apr	1.865.000	1.916.000	1.833.000
8.	Indeks potrošačkog povjerenja APR	88,0	86,0	93,9
9.	Broj zahtjeva za hipotekarne kredite 25. apr	-	-4,2%	-12,7%
10.	ADP promjena broja zaposlenih APR	115.000	62.000	147.000
11.	PMI indeks prerađivačkog sektora F APR	50,5	50,2	50,2
12.	Potrošnja građevinskog sektora (M/M) MAR	0,2%	-0,5%	0,6%
13.	Stopa nezaposlenosti APR	4,2%	4,2%	4,2%
14.	Promjena zaposlenih nefarmerski sektor APR	138.000	177.000	185.000
15.	Promjena zaposlenih privatni sektor APR	125.000	167.000	170.000
16.	Promjena zaposlenih prerađivački sektor APR	-5.000	-1.000	3.000
17.	Fabričke porudžbine MAR	4,5%	4,3%	0,5%
18.	Porudžbine trajnih dobara F MAR	9,2%	9,2%	0,8%

Grafikon 2: Kretanje kursa EURUSD tokom protekle sedmice

USD je aprecirao u odnosu na EUR, te je kurs EURUSD zabilježio pad s nivoa od 1,1365 na nivo od 1,1297.

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

VELIKA BRITANIJA

Slabo povjerenje potrošača, budžetske mjere i globalne nestabilnosti negativno utiču na ekonomski rast. Rast troškova i trgovinske tenzije SAD-a doprinose ovim izazovima. Ministri trgovine iz Velike Britanije i Indije vode finalne pregovore u procesu zaključivanja trgovinskog sporazuma nakon tri godine pregovaranja. Ovaj dogovor ima za cilj smanjivanje tarifa, poboljšavanje pristupa tržištu, te pojednostavljivanje trgovine, uz rješavanje ključnih pitanja, kao što su trgovina viskijem i automobilima.

Zamjenik guvernera BoE Ramsden je naglasio da je potrebno modernizovati tržišta kapitala kroz digitalizaciju, prognozirajući dobitke na efikasnosti koji bi mogli iznositi i do 40% u toku trajanja obveznica i podržavajući prelazak na sistem poravnanja T+1 do 2027. godine. Prosječne dvogodišnje fiksne rate na hipotekarne kredite u Velikoj Britaniji smanjene su na 5,2%, što je najniži nivo od septembra 2022. godine.

Ministrica Reeves je pod istragom inspektora zaduženog za parlamentarne standarde zbog mogućeg kršenja pravila o finansijskim interesima. Prema web-stranici skupštine, istraga, započeta 29. aprila, ima za cilj utvrđivanje usklađenosti s pravilima ponašanja koja je utvrdio Donji dom.

Ured za nacionalnu statistiku (ONS) planira da uvede nove metode računanja inflacije, koristeći podatke „skenera za namirnice” u 2026. godini. ONS će koristiti novi sistem paralelno s trenutnim godinu dana kako bi se osigurao kvalitet.

U četvrtak je objavljen PMI indeks prerađivačkog sektora, koji je pokazao da je ovaj sektor zabilježio kontrakciju već sedmi mjesec zaredom. Poslovno raspoloženje je smanjeno, a troškovi inputa su porasli najbržim tempom od decembra 2022. godine. Inflacioni pritisci su i dalje visoki, a za inflaciju potrošačkih cijena se prognozira da će u aprilu porasti na 3,0% sa 2,6% usljed viših cijena energije i godišnjeg rasta plata od skoro 6%, što je mnogo više od ciljanog nivoa inflacije BoE (2%). Učesnici na tržištu su povećali očekivanja brzih smanjenja kamatnih stopa BoE usljed straha od globalnog ekonomskog slabljenja nakon objavljivanja relativno loših podataka u SAD-u. Tržišta novca sada računavaju četiri smanjenja kamatnih stopa BoE po 25 baznih poena do kraja godine, što bi smanjilo referentnu kamatnu stopu na 3,5% (neke banke predviđaju smanjenje na čak 3,25% do kraja godine). Ekonomisti predviđaju da će BoE smanjiti kamatnu stopu na 4,25% na sastanku 8. maja, što bi bilo drugo smanjenje u ovoj godini, dok kreatori politike BoE ne smatraju da je neophodan hitni zaokret u politici.

Stranka Nigela Faragea je ostvarila značajne pozitivne rezultate na lokalnim izborima u četvrtak, te su dobili stotine mjesta u Vijeću, a on je dobio mjesto u skupštini. Ove pobjede su uzrokovale velike promjene na političkoj sceni Velike Britanije jer su i konzervativci i laburisti pretrpjeli velike gubitke.

Tabela 5: Kretanje ekonomskih indikatora za UK

Red. br.	Ekonomski indikatori		Očekivanje	Stvarno stanje	Prethodni period
1.	BRC indeks maloprodajnih cijena (G/G)	APR	-0,2%	-0,1%	-0,4%
2.	Indeks cijena kuća (G/G)	APR	4,2%	3,4%	3,9%
3.	Potrošački krediti (G/G)	MAR	-	6,1%	6,4%
4.	Odobreni hipotekarni krediti	MAR	64.500	64.300	65.100
5.	Monetarna baza M4 (G/G)	MAR	-	3,4%	3,9%
6.	PMI prerađivačkog sektora F	APR	44,0	45,4	44,9

Tokom protekle sedmice GBP je aprecirala u odnosu na EUR, pa je kurs EURGBP zabilježio pad s nivoa od 0,85357 na nivo od 0,85171. GBP je deprecirala u odnosu na USD, pa je kurs GBPUSD smanjen s nivoa od 1,3315 na nivo od 1,3272.

JAPAN

Na sastanku MPC održanom u četvrtak, BoJ je zadržala referentnu kamatnu stopu na nivou od 0,5% i smanjila prognozu ekonomskog rasta za fiskalnu 2026. godinu koja se završava u martu na 0,5% sa 1,1%, navodeći negativne efekte tarifa SAD-a na izvoz i globalnu trgovinsku neizvjesnost. Sada se predviđa da će inflacija dostići cilj od 2% do kraja fiskalne 2026. godine, što je godinu dana kasnije nego što se prije predviđalo. Očekuje se da će temeljna inflacija u fiskalnoj 2025. godini iznositi 2,2%, te da će se smanjiti na 1,7% u 2026. godini, a zatim porasti na 1,9% u 2027. godini. Guverner BoJ Ueda je ponovio da je BoJ spremna za povećanja referentne kamatne stope, ali je istakao značajne neizvjesnosti u ekonomskim izgledima Japana, uključujući rizike od stagflacije.

Što se tiče pregovora u vezi s tarifama, pregovarači SAD su pokazali opreznost u vezi sa smanjenjem tarifa na automobile, čelik i aluminij tokom razgovora s kolegama iz Japana. Ministar finansija SAD Bessent se sastao s pregovaračem Japana Ryosei Akazawa, prezentujući predloženi okvir trgovinskog sporazuma. Akazawa se nada da će trgovinski sporazum sa SAD-om biti do juna finaliziran, uprkos neslaganjima u vezi s tarifama na automobile. Razgovori su obuhvatili proširenje trgovine, ekonomsku sigurnost i bescarinske mjere, pri čemu se Japan protivi prijedlogu SAD-a o tarifi na automobile od 25%. Zaštita automobilske i poljoprivrednog sektora je ključna jer ovi sektori podržavaju mnoga radna mjesta. Akazawa teži ka postizanju sporazuma sa SAD-om prije stupanja recipročnih tarifa na snagu u julu, kako bi zaštitio interese Japana. Nakon što su SAD uvele carine na autodijelove, koje su stupile na snagu 3. maja, premijer Japana Ishiba je ocijenio tarife kao „apsolutno neprihvatljive i žalosne“, naglašavajući da smanjenje trgovinskog deficita SAD-a ne bi trebalo biti postignuto na račun radnih mjesta u Japanu.

Tabela 6: Kretanje ekonomskih indikatora za Japan

Red. br.	Ekonomski indikatori		Očekivanje	Stvarno stanje	Prethodni period
1.	Industrijska proizvodnja (G/G) P	MAR	0,8%	-0,3%	0,1%
2.	Maloprodaja (G/G)	MAR	3,5%	3,1%	1,3%
3.	Indeks započelih kuća (G/G)	MAR	1,0%	39,1%	2,4%
4.	Vodeći indeks F	FEB	-	107,9	108,2
5.	Koicidirajući indeks F	FEB	-	117,3	116,4
6.	PMI indeks prerađivačkog sektora F	APR	-	48,7	48,4
7.	Stopa nezaposlenosti	MAR	2,4%	2,5%	2,4%
8.	Odnos broja slobodnih radnih mjesta i broja prijavljenih	MAR	1,25	1,26	1,24
9.	Novčana baza (G/G)	APR	-	-4,8%	-3,1%
10.	Indeks povjerenja potrošača	APR	33,8	31,2	34,1

JPY je tokom protekle sedmice deprecirao u odnosu na EUR, te je kurs EURJPY zabilježio povećanje s nivoa od 163,30 na nivo od 163,80. JPY je deprecirao i u odnosu na USD, te je kurs USDJPY zabilježio povećanje s nivoa 143,67 na nivo od 144,96.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 63,02 USD (55,45 EUR).

Početkom sedmice cijena nafte je bilježila smanjenje, dok su se investitori fokusirali na odluke o snabdijevanju OPEC+ usred globalnih neizvjesnosti. Trgovinske tenzije i nuklearni pregovori s Iranom su faktori koji i dalje primarno utiču na tržište ovog energenta. Nastavak smanjenja cijene nafte je uzrokovan smanjenim očekivanjima rasta potražnje zbog trgovinskog rata između SAD-a i Kine. Izvoz nafte iz Kazahstana u I kvartalu je porastao za 7% u odnosu na isti period prethodne godine, što je doprinijelo prezasićenosti ponude. Korekcija cijene ovog energenta navise uslijedila je u četvrtak, kada je cijena povećana za oko 2%, nakon što je predsjednik Trump zaprijetio sekundarnim sankcijama Iranu, obustavivši kupovinu iranske nafte i petrohemijskih proizvoda. Razgovori o iranskom nuklearnom programu su odgođeni, a buduće rasprave zavise od američkih akcija. Analitičari predviđaju potencijalno smanjenje ponude za 1,5 miliona barela dnevno ako sankcije budu provedene. Saudijska Arabija je izrazila spremnost da održi niske cijene, dok OPEC+ razmatra povećanje proizvodnje. Na kraju sedmice cijena nafte je zabilježila smanjenje, dok je OPEC+, predvođen Saudijskom Arabijom i Rusijom, poništio prethodno smanjenje proizvodnje kako bi izvršio povrat tržišnog učešća, dodatno vršeći pritisak na cijenu ovog energenta. Tržišni učesnici su smanjili prognoze cijene nafte, navodeći slab rast potražnje i neizbježnost nižih cijena. Pad troškova energije mogao bi pomoći u ublažavanju inflatornih pritisaka, a što je u skladu s nastojanjem predsjednika Trumpa ka nižim cijenama energije kako bi se podržala ekonomska stabilnost. Međutim, zabrinutost zbog usporavanja globalne ekonomije i potencijalne recesije zbog trgovinskog rata opteretila je izgleda potražnje za ovim energentom. Razgovori OPEC+ o ubrzanju povećanja proizvodnje u junu doprinose oprezu tržišta.

Na zatvaranju tržišta u petak cijena jednog barela sirove nafte je iznosila 58,29 USD (51,60 EUR), što predstavlja pad od 7,51% na sedmičnom nivou.

Grafikon 3: Kretanje cijene nafte tokom protekle sedmice




Na otvaranju londonske berze metala u ponedjeljak cijena jedne fine unce zlata je iznosila 3.319,72 USD (2.921,00 EUR).

Na početku sedmice cijena zlata se kretala u uskom rasponu jer je ublažavanje trgovinskih tenzija između SAD-a i Kine podstaklo apetit za rizikom. U utorak je zabilježeno blago smanjenje cijene ovog plemenitog metala kako su rasla očekivanja da će predsjednik Trump ublažiti carine na automobile. Aprecijacija dolara je, također, imala dodatni pritisak na smanjenje cijene ovog plemenitog metala, čineći ga skupljim za kupce koji koriste druge valute. Međutim, cijena zlata je dobila određenu podršku od vijesti da su podaci s američkog tržišta bili slabiji od očekivanja. Smanjenje cijene zlata nastavljeno je i u srijedu i četvrtak. Na kraju sedmice ista se kretala u uskom rasponu.

WGC je objavio izvještaj o aktuelnim trendovima potražnje za zlatom u I kvartalu u kojem je navedeno da je ista dostigla nivo od 1.206 tona, što je ujedno i najveći kvartalni rast potražnje od 2016. godine. Navedeni rast potražnje je bio podstaknut naglim prilivom ETF-ova koji investiraju u zlato, kao i snažnom potražnjom za polugama i zlatnicima, dok je potražnja za zlatnim nakitom pala na najniži nivo od 2020. godine zbog rekordnih cijena. Centralne banke su dodale 244 tone zlata globalnim rezervama, što je za 24% više od petogodišnjeg kvartalnog prosjeka, ali 21% manje u odnosu na isti period prethodne godine. Ključni kupci su bili: Narodna banka Poljske (49 tona), Narodna banka Kine (13 tona) i Kazahstana (6 tona). Prodaja je bila skromna, a prednjačili su Uzbekistan (15 tona), Rusija (3 tone) i Kirgistan (2 tone). Globalna neizvjesnost i vrijednost zlata kao aktive za zaštitu od kriznih perioda podržali su potražnju i povećali cijenu ovog plemenitog metala.

Na zatvaranju tržišta u petak cijena jedne fine unce zlata je iznosila 3.240,49 USD (2.868,45 EUR), što predstavlja pad od 2,39% na sedmičnom nivou.

Grafikon 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.